

Samgöngu- og sveitarstjórnarráðuneytið  
b.t. Ólafs Kr. Hjörleifssonar  
Sölvhólgötu 7  
101 Reykjavík

Reykjavík, 11. apríl 2018

### EFNI: Stjórnsýslueftirlit vegna bæjarstjórnar Hafnarfjarðar

Til Réttar hafa leitað Borghildur Sölvey Sturludóttir og Pétur Óskarsson, sem eru varabæjarfulltrúar í sveitarstjórn Hafnarfjarðarbæjar. Málið varðar annars vegar ákvarðanir Guðlaugar Svölu Steinunnar Kristjánsdóttur um setu í og úr bæjarstjórn og hins vegar missir kjörgengis og þá samhliða lausn frá störfum bæjarfulltrúans Einars Birkis Einarssonar.

Erindi þetta byggir á XI. kafla sveitarstjórnarlaga nr. 138/2011, en þess er óskað að ráðuneytið taki erindi þetta til umfjöllunar á grundvelli 109. gr. laganna er mæla fyrir um almennt stjórnsýslueftirlit ráðherra með því að sveitarfélög gegni skyldum sínum samkvæmt sveitarstjórnarlögum og öðrum löglegum fyrirmælum. Telji ráðuneytið ekki tilefni til að taka málið til formlegrar umfjöllunar að eigin frumkvæði áskilja umbjóðendur mínir sínir rétt sinn til að leggja fram stjórnsýslukæru vegna málsins.

#### I. Guðlaug Svala Steinunn Kristjánsdóttir

Fyrri umkvörtunarefni umbjóðenda minna lýtur að ákvörðunum Guðlaugar Kristjánsdóttur um setu í og úr bæjarstjórn Hafnarfjarðar.

Á fundi bæjarstjórnar Hafnarfjarðar nr. 1802 þann 14. mars 2018 var tekin fyrir tilkynning Guðlaugar Svölu Kristjánsdóttur um ótímabundin forföll sem bæjarfulltrúi. Fjallað er um forföll aðalmanna í 2. og 3. mgr. 31. gr. sveitarstjórnarlaga, en erindi hennar var afgreitt á grundvelli síðastnefnda ákvæðisins sem er bundið við tilvik þegar aðalmaður tekur hlé frá störfum í a.m.k. einn mánuð vegna lögmætra forfalla. Í greinargerðinni með frumvarpinu er jafnframt fjallað um að ákvæðið nái einungis til þess þegar forföll eru „ekki aðeins tilfallandi heldur standa í einn mánuð eða lengri tíma.“ Í greinargerð með lögnum segir að tilgangur 30. og 31. gr. sé að setja í fastari skorður innkallanir varamanna á einstaka sveitarstjórnarfundum. Í umfjöllun greinargerðarinnar um 30. gr. laganna segir að reglum um tímabundna lausn frá störfum, t.d. vegna veikinda, sé m.a. sá að koma í veg fyrir að þeir sem kjörnir eru í sveitarstjórn geti ekki

vikið úr þeim af geðþóttaástandum einum og tryggja festu í störfum sveitarfélaganna. Að mati umbjóðanda minna gilda sömu sjónarmið um 31. gr. laganna.

Nú hefur Guðlaug tilkynnt að hún hyggist taka sæta sitt að nýju sem aðalmaður í bæjarstjórn og skilst umbjóðendum okkar að það erindi verði tekið til umfjöllunar á fundi bæjarstjórnar Hafnarfjarðar sem boðað hefur verið til kl. 17 í dag (11. apríl 2018). Það er í andstöðu við áðurnefnda 3. mgr. 31. gr., enda er ekki liðinn mánuður frá því að forföllin hófust og umbjóðandi minn, Borghildur Sölvey Sturludóttir tók sæti í bæjarstjórninni.

## II. Einar Birkir Einarsson

Síðara umkvörtunarefni umbjóðenda minna lýtur að kjörgengi Einars Birkis Einarssonar en skv. 1. mgr. 30. gr. sveitarstjórnarlaga þá skal sveitarstjórnamaður víkja úr sveitarstjórn ef hann missir kjörgengi.

Í 1. mgr. 3. gr. laga um kosningar til sveitarstjórnar nr. 5/1998 segir að kjörgengur sé sá sem m.a. á kosningarétt í sveitarfélaginu skv. 2. gr. laganna, en þar er gerður áskilnaður um lögheimili í sveitarfélaginu.

Einar Birkir Einarsson er með skráð lögheimili við Grænukeið 1, 220 Hafnarfirði (sjá fylgiskjal 1) þar sem systir hans, Arndís Harpa Einarsdóttir, býr ásamt fjölskyldu sinni (sjá fylgiskjal 2). Hann býr hins vegar í einbýlishúsi við Álfaheiði 13, 200 Kópavogi, sem hann á með sambýliskonu sinni, Huldu Rögnu Valsdóttur (sjá fylgiskjal 3). Í þessu sambandi er vakin athygli á því að sambýliskona Einars Birkis er með skráð lögheimili að Álfaheiði 13 (sjá fylgiskjal 4).

Samkvæmt 1. mgr. 1. gr. laga um lögheimili nr. 21/1990 er lögheimili manns sá staður þar sem hann hefur fasta búsetu en skv. 2. mgr. 1. gr. laganna telst maður hafa fasta búsetu á þeim stað þar sem hann hefur bækistöð sína, dvelst að jafnaði í tólmstundum sínum, hefur heimilismuni sína og svefnstaður hans er þegar hann er ekki fjarverandi um stundarsakir. Fjallað var um lögheimilisskráningu Einars Birkis á visir.is þann 7. apríl 2018 en þar kemur fram Einar búi í Kópavogi (fylgiskjal 5). Að sögn fréttamannsins náðist ekki í Einar Birki við vinnslu fréttarinnar.

Umbjóðendur mínir telja ríkt tilefni til að ráðuneytið afli upplýsinga frá Einari um búsetu hans svo unnt sé að staðfesta hvort Einar njóti enn kjörgengis eða hvort leysa beri hann frá störfum sökum missis þess, sbr. áðurnefnd 1. mgr. 30. gr. sveitarstjórnarlaga.

## III. Niðurlag

Umbjóðendur mínir vísa til alls framangreinds og óska þess að afgreiðslu erindis þessa verði flýtt eins og kostur er, enda sérstaklega óheppilegt að uppi sé vafi um það hverjir eiga rétt til setu og ákvörðunartöku á vettvangi sveitarstjórnar. Það er því sérstaklega brýnt að málið sé sett í forgang, enda ljóst að ágreiningur er á milli sveitarstjórnarmanna um það hver eigi rétt til setu í bæjarstjórn með tilheyrandi vafa um lögmæti þeirra ákvarðana sem þar eru teknar.

Virðingarfyllt,



Sigurður Örn Hilmarsson hrl.